



Entrée de Iesus-Christ en Ierusalem, accompagné de ses Apostres, où il est reçu avec ioye.

R aduint comme Iesus approchoit de Ierusalem & de Bethanie, vers le mont des Oliues, il enuoya deux de ses Disciples au village prochain, disant : Quand vous y ferez, vous trouuerez vne asnesse liée, & vn asnon, sur lequel iamais homme ne s'assit, desliez-les, & me les amenez. Et si quelqu'un vous dit, Pourquoi faites-vous cecy? répondez-luy, Que le Seigneur en a affaire, & incontinent il les laissera aller. Or tout cecy se faisoit selon la Prophecie de Zacharie, chapitre neuvième. Les Disciples donc s'en allerent & firent ainsi que Iesus leur auoit ordonné : Et amenerent l'asnesse & l'anon, & ayans mis leurs vestemens dessus, le firent asseoir. Et ainsi qu'il alloit, plusieurs estendirent leurs vestemens en la voye, & les autres coupoient des rameaux & branches d'arbres, & les espanchoient en chemin. Et comme il approchoit à la montagne des Oliues, toute la multitude & les Disciples s'esioüissans, commencerent à louer Dieu à haute voix, pour toutes les vertus qu'ils auoient veuës, disans; *Osanna* fils de Daud, Benit soit celuy qui vient au nom du Seigneur. Et quand Iesus approchant vid la Cité, il pleura sur elle.

S. Matthieu Chap. 21. S. Marc Chap. 11. S. Luc Chap. 19. S. Iean Chap. 12.